

增批
歸方評點史記

同文圖書館
印行

卷一

解方年表文記

明倫彙編
家範典

第坤曰太史
序次相如愛
其文賦而已
予覽之多為
魂魄奇崛騷
再變矣持機
蜀父老與諫
獵書絕佳

司馬相如列傳第五十七

史記一百十七

司馬相如者蜀郡成都人也字長卿少時好讀書學
擊劍故其親名之曰犬子相如既學慕蘭相如之為
人更名相如以貲為郎事孝景帝為武騎常侍非其
好也會景帝不好辭賦是時梁孝王來朝從游說之
士齊人鄒陽淮陰枚乘吳莊忌夫子之徒相如見而
說之因病免客游梁梁孝王令與諸生同舍相如得
與諸生游士居數歲乃著子虛之賦會梁孝王卒相
如歸而家貧無以自業素與臨邛令王吉相善吉曰
長卿久宦游不遂而來過我於是相如往舍都亭臨
邛令繆為恭敬日往朝相如相如初尚見之後稱病

使從者謝吉吉愈益謹肅臨邛中多富人而卓王孫家僮八百人程鄭亦數百人二人乃相謂曰令有貴客爲具召之并召令既至卓氏客以百數至日中謁司馬長卿長卿謝病不能往臨邛令不敢嘗食自往迎相如相如不得已彊往一坐盡傾酒酣臨邛令前奏琴曰竊聞長卿好之願以自娛相如辭謝爲鼓一再行是時卓王孫有女文君新寡好音故相如繆與令相重而以琴心挑之相如之臨邛從車騎雍容閒雅甚都及飲卓氏弄琴文君竊從戶窺之心悅而好之恐不得當也既罷相如乃使人重賜文君侍者通殷勤文君夜亡奔相如相如乃與馳歸成都家居

茅坤曰他人
不下手處太
史公偏下手

徒四壁立。卓王孫大怒曰：女至不材，我不忍殺。不分一錢也。人或謂王孫：王孫終不聽。文君久之不樂，曰：長卿第俱如臨邛，從昆弟假貸，猶足爲生，何至自苦如此？相如與俱之臨邛，盡賣其車騎，買一酒舍，酤酒，而令文君當鑪。相如身自著犢鼻褌，與保庸雜作，滌器於市中。卓王孫聞而恥之，爲杜門不出。昆弟諸公更謂王孫曰：有一男兩女，所不足者非財也。今文君已失身於司馬長卿，長卿故倦游，雖貧，其人材足依也。且又令客獨奈何相辱如此？卓王孫不得已，分予文君僮百人，錢百萬，及其嫁時衣被財物。文君乃與相如歸成都，買田宅，爲富人居。久之，蜀人楊得意爲

楊慎曰此太史總子虛賦之旨為訓詁法
倪思曰賦無異直誇多聞靡如色龍曼行欲不可極使人動心駭目

狗監侍上。上讀子虛賦而善之。曰朕獨不得與此人同時哉。得意曰。臣邑人司馬相如。自言為此賦。上驚。乃召問相如。相如曰。有是。然此乃諸侯之事。未足觀也。請為天子游獵賦。賦成奏之。上許。令尚書給筆札。相如以子虛虛言也。為楚稱。烏有先生者。烏有此事也。為齊難。無是公者。無是人也。明天子之義。故空藉此三人為辭。以推天子諸侯之苑囿。其卒章歸之於節儉。因以風諫。奏之天子。天子大說。其辭曰。楚使子虛使於齊。齊王悉發境內之士。備車騎之眾。與使者出田。田罷。子虛過詫。烏有先生而無是公在焉。坐定。烏有先生問曰。今日田樂乎。子虛曰。樂。獲多乎。曰。少。

然則何樂。曰。僕樂齊王之欲夸僕以車騎之衆。而僕對以雲夢之事也。曰。可得聞乎。子虛曰。可。王駕車千乘。選徒萬騎。田於海濱。列卒滿澤。罟罔彌山。揜兔獐鹿。射麋脚麟。驚於鹽浦。割鮮染輪。射中獲多。矜而自功。顧謂僕曰。楚亦有平原廣澤。游獵之地。饒樂若此者乎。楚王之獵。何與寡人。僕下車對曰。臣。楚國之鄙人也。幸得宿衛。十有餘年。時從出游。游於後園。覽於有無。然猶未能徧覩也。又惡足以言其外澤者乎。齊王曰。雖然。略以子之所聞見而言之。僕對曰。唯唯。臣聞楚有七澤。嘗見其一。未覩其餘也。臣之所見。蓋特其小小者耳。名曰雲夢。雲夢者。方九百里。其中有山。

倪思曰龍鱗
語工丹青亦
白何莫不然
實子虛用

焉其山則盤紆峩鬱隆崇律率岑巖參差日月蔽虧
交錯糾紛上干青雲罷池陂陲下屬江河其土則丹
青赭堊雌黃白垺錫碧金銀衆色炫耀照爛龍鱗其
石則赤玉玫瑰琳琅琨珷瑊玢玳瑁石武夫其東
則有蕙圃衡蘭芷若射干穹窮昌蒲江離靡蕪諸蔗
搏且其南則有平原廣澤登降陟靡案衍壇曼緣以
大江限以巫山其高燥則生葳蕤苞荔薛莎青蘋其
卑溼則生藏蓂蒹葭東薈雕胡蓮藕菰蘆菴蘭軒芋
衆物居之不可勝圖其西則有湧泉清池激水推移
外發芙蓉菱華內隱鉅石白沙其中則有神龜蛟鼉
瑇瑁鼈鼉其北則有陰林巨樹榧枏豫章桂椒木蘭

檠離朱楊。榱桷櫟栗。橘柚芬芳。其上則有赤猿蠼螋。鵠雛孔鸞。騰遠射干。其下則有白虎玄豹。蝮蛇貙豸。兕象野犀。窮奇獫狁。於是乃使專諸之倫。手格此獸。楚王乃駕馴駁之駟。乘雕玉之輿。靡魚須之橈。旃曳明月之珠旗。建干將之雄戟。左烏嗥之雕弓。右夏服之勁箭。陽子驂乘。纖阿爲御。案節未舒。卽陵狡獸。鱗邛邛。楚距虛。軟野馬。而驄駒駘。乘遺風而射游騏。儻呻淒淒。雷動慄至。星流霆擊。弓不虛發。中必決眚。洞胃達腋。絕乎心繫。獲若雨獸。揜草蔽地。於是楚王乃弭節裴回。翱翔容與。覽乎陰林。觀壯士之暴怒。與猛獸之恐懼。徼徂受訕。殫睹衆物之變態。於是鄭女曼

五言古詩
一
姬被阿錫。揄紵縞襍。纖羅垂霧縠。襞積寒縠。紆徐委
曲。鬱撓谿谷。紛紛袞袞。揚施卹削。蜚纖垂髻。扶與猗
靡。噏呷萃蔡。下摩蘭蕙。上拂羽蓋。錯翡翠之威。粦繆
繞玉綬。縹乎忽忽。若神仙之仿佛。於是乃相與獠於
蕙圃。嬰珊勃窣。上金隄。揜翡翠。射鵝鵝。微矰出。纖繳
施。弋白鵠。連駕鵝。雙鵠下。玄鶴加。怠而後發。游於清
池。浮文鵠。楊桂枻。張翠帷。建羽蓋。罔瑋瑁。鈞紫貝。攄
金鼓。吹鳴籥。榜人歌。聲流喝。水蟲駭。波鴻沸。涌泉起。
犇揚會。礪石相擊。礪礪礪。若雷霆之聲。聞乎數百
里之外。將息獠者。擊靈鼓。起烽燧。車案行。騎就隊。纒
乎淫淫。班乎裔裔。於是楚王乃登陽雲之臺。泊乎無

爲澹乎自持。勺藥之和具而後御之。不若大王終日馳騁而不下輿。將割輪淬。自以爲娛。臣竊觀之。齊殆不如。於是王默然無以應僕也。烏有先生曰。是何言之過也。足下不遠千里來。況齊國王悉發境內之士而備車騎之衆。以出田。乃欲勦力致獲以娛左右也。何名爲夸哉。問楚地之有無者。願聞大國之風烈。先生之餘論也。今足下不稱楚王之德厚而盛推雲夢以爲高。奢言淫樂而顯侈靡。竊爲足下不取也。必若所言。固非楚國之美也。有而言之。是章君之惡。無而言之。是害足下之信。章君之惡而傷私義。二者無一可。而先生行之。必且輕於齊而累於楚矣。且齊東階

巨海。南有琅邪。觀乎成山。射乎之罘。浮勃解。游孟諸。邪與肅慎爲鄰。右以湯谷爲界。烱田乎青丘。傍徨乎海外。吞若雲夢者八九。其於胷中。曾不蒂芥。若乃俶儻瑰偉。異方殊類。珍怪鳥獸。萬端鱗萃。充仞其中者。不可勝記。禹不能名。契不能計。然在諸侯之位。不敢言遊戲之樂。苑囿之大。先生又見客。是以王辭而不復。何爲無用應哉。無是公听然而笑曰。楚則失矣。齊亦未爲得也。夫使諸侯納貢者。非爲財幣。所以述職也。封疆畫界者。非爲守禦。所以禁淫也。今齊列爲東藩。而外私肅慎。捐國踰限。越海而田。其於義故未可也。且二君之論。不務明君臣之義。而正諸侯之禮。徒

楊慎曰左蒼梧右西極其誕著矣丹水紫淵若有若無雜以涇渭聽者駭耳

事爭游獵之樂。苑囿之大。欲以奢侈相勝。荒淫相越。此不可以揚名發譽。而適足以貶君自損也。且夫齊楚之事。又焉足道邪。君未睹夫巨麗也。獨不聞天子之上林乎。左蒼梧。右西極。丹水更其南。紫淵徑其北。終始霸漭。出入涇渭。酆鄩潦漭。紆餘委蛇。經營乎其內。蕩蕩兮八川分流。相背而異態。東西南北。馳驚往來。出乎椒丘之闕。行乎洲淤之浦。徑乎桂林之中。過乎泱莽之野。汨乎渾流。順阿而下。赴隘陝之口。觸穹石。激堆埼。沸乎暴怒。洶涌澎湃。潏潏淅淅。洑洑瀾瀾。橫流逆折。轉騰激洑。澎湃沆瀣。穹隆雲繞。蜿瀾膠戾。踰波趨浥。莅莅下瀨。批巖衝壅。犇揚滯沛。臨坻注壑。

漢爵竇墜湛湛隱隱砰磅訇磕潏潏淈淈汔漭鼎沸
馳波跳沫汨急漂疾悠遠長懷寂寥無聲肆乎永歸
然後灝灝潢潢安翔徐徊嚮平瀄瀄東注大湖衍溢
陂池於是乎蛟龍赤螭鮪鱣蜥離魴鰠鰉魚禺禺鯢
魴捷鰭擢尾振鱗奮翼潛處於深巖魚鼈謹聲萬物
眾夥明月珠子玃璫江靡蜀石黃磬水玉磊砢磷磷
爛爛采色濔盱叢積乎其中鴻鵠鸛鳴鴟鵂鷩鷯鷩
鯖鰕日煩驚鷓鴣鷦鷯羣浮乎其上升淫泛濫
隨風澹淡與波搖蕩掩薄草渚唼喋菁藻咀嚼菱藕
於是乎崇山龍嵒崔巍差峩深林鉅木嶄巖參差九
變截薛南山峩峩巖陲甌錡摧萎屈崎振谿通谷蹇

高儀曰出東
沼入于西波
七字忽見而
止最是有意
皆言南北之
相反

產溝瀆。谿呀豁開。官陵別島。歲魄裏痾。上墟崩轟。隱
麟鬱嶠。登降施靡。陂池獬豸。沈溶淫鬻。散渙夷陸。亭
皋千里。靡不被築。掩以綠蕙。被以江離。糝以蘘蕪。襍
以流夷。專結縷。攢戾莎。揭車衡蘭。藁本射干。芷薑蘘
荷。葳橙若蓀。鮮枝黃礫。蔣茅青蘋。布濩閎澤。延曼太
原。麗靡廣衍。應風披靡。吐芳陽烈。郁郁斐斐。眾香發
越。肝蠻布寫。晻曖苾勃。於是乎周覽泛觀。瞋盼軋沕。
芒芒恍忽。視之無端。察之無崖。日出東沼。入於西陂。
其南則隆冬生長。踊水躍波。獸則慵旌。獮犛。沈牛塵
麋。赤首圓題。窮奇象犀。其北則盛夏含凍。裂地涉水。
揭河獸則麒麟角规。駒駼橐駝。蛩蛩驪騮。駃騠驢騾。

於是乎離宮別館。彌山跨谷。高廊四注。重坐曲閣。華
棖璧璫。輦道纒屬。步櫚周流。長途中宿。夷嵒築堂。累
臺增成。巖突洞房。俛杳眇而無見。仰攀櫟而捫天。犇
星更於閨闥。宛虹拖於楯軒。青虬蚴蟉於東箱。象輿
婉蟬於西清。靈囿燕於閒觀。偃佺之倫。暴於南榮。醴
泉涌於清室。通川過乎中庭。槃石振崖。欽巖倚傾。差
我礫磔。刻削崢嶸。玫瑰碧琳。珊瑚叢生。瑁玉殉唐。瑣
編文鱗。赤瑕駁犖。襍畱其閒。垂綬琬琰。和氏出焉。於
是乎盧橘夏孰。黃甘橙檟。枇杷檮柿。檉櫟厚朴。檮棗
楊梅。櫻桃蒲陶。隱夫鬱棣。榕櫟荔枝。羅乎後宮。列乎
北園。馳丘陵。下平原。楊翠葉。机紫莖。發紅華。秀朱榮。

煌煌扈扈。炤曜鉅野。沙棠櫟楮。華汜櫛櫨。畱落胥餘。
仁頻并閭。欂櫨木蘭。豫章女貞。長千仞。大連抱。夸條
直暢。實葉蓂茂。攢立叢倚。連卷累俛。崔錯發飢。阮衡
聞矧。垂條扶於。落英幡纒。紛容蕭蔘。旖旎從風。瀏莅
崑吸。蓋象金石之聲。管籥之音。柴池芑虬。旋環後宮。
雜還累輯。被山緣谷。循阪下隰。視之無端。究之無窮。
於是玄媛素雌。蜚獲飛鷗。蛭蜩蠓蠕。蜥蜴胡穀。蛻棲息
乎其閒。長嘯哀鳴。翩幡互經。天矯枝格。偃蹇杪顛。於
是乎隄絕梁。騰殊榛。捷垂條。踔稀閒。牢落陸離。爛曼
遠遷。若此輩者。數千百處。嬉游往來。宮宿館舍。庖廚
不徙。後宮不移。百官備具。於是乎背秋涉冬。天子校